

STAVOVI Wolfgang Petrič i Kristofer Solioz za 'Avaz'

Niko se ne treba plašiti Dejtona II

Stanje u BiH treba se u cijelosti i detaljno ponovo razmotriti • Utjecaj Rusije i Turske u regionu porastao, „meke moći“ Zapada dramatično oslabile

Krajnje je vrijeme, 25 godina od početka rata, da se u Bosni i Hercegovini okonča mračno postratno vrijeme. Uprkos nekim skromnim rezultatima, ukupna situacija u ovoj državi je deprimirajuća. Istina, nije to ništa novo. Ali, ukupna i regionalna situacija bitno se izmijenila.

Stoga, stanje u BiH treba se u cijelosti i detaljno ponovo razmotriti, smatraju u autorskom tekstu nekadašnji visoki predstavnik u BiH Wolfgang Petrič (Wolfgang Petritsch) i Kristof Solioz (Christophe Solioz), politički analitičar i profesor filozofije.

Štetna Hrvatska

„Dnevni avaz“ dobio je prvi prilog dvojice eminentnih autora i stručnjaka za balkanska pitanja.

Oni upozoravaju da, na primjer, ulazak Hrvatske u NATO i Evropsku uniju nije doprinio stabilnosti BiH niti njenom daljnjem integriranju u zapadne saveze. Uzto, „nakon decenija međunarodnog intervencioniz-



Petrič i Solioz: Ulazak BiH u EU je prioritetan

ma, anemičnih strategija koje su imale za cilj jačanje integracija samog regiona“, čak je i teritorijalno integritet BiH, Kosova i Makedonije pod upitnikom.

- Dok je utjecaj Rusije i Turske u regionu porastao, „meke moći“ Zapada dramatično su oslabile. Šta još više brine, ukupna sigurnosna situacija u centralnoj i istočnoj Evropi ugrožena je i budi zastrašujuće sličnosti sa stanjem u Evropi iz tridesetih godina prošlog stoljeća. Ovome treba dodati i



da izgleda da su eksperti i politički lideri izgubljeni i bez nade. To uopće nije dobra osnova za rješavanje bh. problema – ističu autori.

Podsjećaju da je još 2003. godine na samitu u Solunu balkanskim državama obećan ulazak u EU, ali da Unija nije bila u stanju održati datu riječ.

- Očuvanje statusa quo ključna je i katastrofalna strategija EU. Kada je BiH u pitanju, Unija, međutim, ima obavezujuću odgovornost – ističu autori.

Petrič i Solioz pozivaju na „otvaranje Pandorine kutije“ i naglašavaju da je to neizbježno.

A pod Pandorinom kutijom oni podrazumijevaju Dejtonski sporazum, koji je „tada, 1995. godine, imao smisla“. Sada, međutim, Dejton „u cijelosti opstruira sudbinu BiH“.

- Lokalni, regionalni i međunarodni akteri odgovorni su za – sada – neizbježne promjene. Odista, otvaranje Pandorine kutije, s ciljem oživljavanja nade da će se „bajka“ o dva entiteta okončati. I niko ne treba strahovati od Dejtona II – ističu oni.

EU imperija

Autori navode i da je stoljećima BiH egzistirala, prilično stabilno, pod „okriljem“ neke od imperija.

- Danas samo EU može osigurati takav okvir. Stoga je integriranje BiH u ovaj blok od izuzetne važnosti. On je imperativ i zato kao prvi korak taj proces treba dobiti status prioritetnog partnerstva – navedeno je u tekstu. **S.N.**